

Ախալցխա, 19 Ֆայիսի

Հայկական տառերի գիւտի 1500-ամեակի և տպագրութեան 400-ամեակի յօրելեաննորը քաղաքումս տօնելու համար, անցեալ փետրվար ամսում, տեղական Դր. Սիրոզների Ընկ. վարչութեան նախաձեռնութեամբ տեղի ունեցան մի քանի խառն նախապատրաստական ժողովներ, որտեղ բացի Դրամատիկականից մասնակցում էին Կ. Հ. Բ. Ընկ. տեղական ճիւղի, Հայ Կանանց Բարեգ. Ընկ. վարչութիւնները, երկսեռ դպրոցների հոգաբարձուները, վիճակիս փոխանորդը, մի քանի ուսուցիչներ և այլ անձինք:

Միայն հայոց դպրոցների ուսուցչ. խումբերն էին, որ մերժել էին մասնակցելու այս համազգային տօնին և ուսուցիչներէց մասնակցեցին մի քանիսը միայն ազատ կամքով: Մշակելով տօնակատարութեան ծրագիրը, յիշեալ խառն ժողովը իր միջից ընտրեց մի գործադիր մարմին 9 հոգուց բաղկացած այդ յօրելեանը գլուխ բերելու համար նշանակված օրին:

Սակայն նշանակված օրը հանդէսը տեղի չունեցաւ մեզ անյայտ պատճառով. լսեցինք, որ գործադիր մարմինը ինքնագլուխ յետաձգել էր:

Ամենայն իրաւամբ սպասում էինք, որ նրանք այդ յետաձգման պատճառների մասին նախօրօք իրանց ընտրող խառն ժողովին տեղեկութիւն տային. սակայն ի գուրս Գործադիր մարմինը ինքն իրան տէր ու տնօրէն ենթադրելով, այլ ևս չէր ճանաչում իրան ընտրող մարմիններին և ինքնիշխան ինչ որ ուզում կարգադրում ու որոշում էր. և այսպէս. գաղտագողի, ապրիլի 28-ին, Կարապետեան դպրոցում կատարվում է այդ համազգային տօնը, առանց նախապէս տեղեկացնելու իրան ընտրողներին, որոնցից շատերը այդ օրը հանդիստ տանը նըստած են եղել Այդ մասին մենք պատահմամբ լսեցինք և շատ զարմացանք, թէ սա ինչ խաղ է: Ինչի՞ն վերագրենք այս վարժունքը. նրանց տգիտութեանը թէ հասկանութեանը, որը առիթ է տուել իրանց ընտրողների մեծամասնութեան դժգոհութեան ու հիասթափման: Իեռ մի կողմը թողնենք, թէ այդ հանդէսը որքան անգոյն է անցել շնորհիւ մեր գործադիր մարմնի թուլութեան. բայց միթէ այդ ամենատարրական պարտականութիւնը նրանք չէին հասկանում, միթէ չէին ըմբռնում, որ իրանց ընտրողների ծրագրից շեղել նրանց ոչ ոք լիազօրութիւն չէր տուած: Յաւալի է:

Խառն ժողովի անդամ՝

Լևոն Հէպէպեան